

Allannguutissatut siunnersuut

uunga

Uunga siunnersuut:

**Uranimik il. il., misissueqqaarnermut, ujaasinermit piiiaanermullu inerteqquteqarneq pillugu
Inatsisartut inatsisaat.**

Pingajussaaneerinninninnermut Inuussutissarsiornermut Aatsitassanullu Ataatsimiititaliami
ikinnerussuteqartunit Atassutip ilaasortaaitaanit saqqummiunneqartoq

§ 5-imut

1. § 5 imatut oqaasertaqassaaq:

” § 5. Naalackersuisut nalunaarutikkut Inatsisartut inatsisaat manna atuutilersissinnaavaat. Siusinnerpaamik atuutilersitsisoqarsinnaavoq Inatsisartut inatsisaat pillugu najoqqutassiiviusumik innuttaasunik taasisitsisoqareernerata kingorna sapaatit akunnerisa sisamat qaangiunneranni.

Imm. 2. Inatsisartut inatsisaat pillugu najoqqutassiiviusumik innuttaasunik taasisitsinermit peqataasinnaatitaapput kikkulluunniit ullormi taasisitsiviusumi Inatsisartunut qinersisinnaatitaanermut piumasagaatinik naammassinnissimasut aamma Inatsisartunut qinersisarneq pillugit Inatsisartut inatsisaat malillugu qinersisinnaatitaasut allattorsimaffiannut ilanngunneqarsimasut.

Imm. 3. Taasisitsinerup piareersarneqarnera ingerlanneqarneralu, taasisitsinerup inernerata naatsorsorneqarnera tamannalu pillugu nalunaaruteqarneq kiisalu taasisitsineq pillugu naammagittaalliuuteqarneq il.il. Inatsisartunut qinersisarneq pillugu Inatsisartut inatsisaanni malittarisassat malillugit pissapput, sanioqqutsinernik Qinersinermit Ataatsimiititaliap pisariaqartutut isigisaanik sanioqqullugit.

Imm. 4. Taasisitsinermit apeqqut ”Uranimik il. il., misissueqqaarnermut, ujaasinermit piiiaanermullu inerteqquteqarneq pillugu Inatsisartut inatsisaata Naalackersuisunit atuutilersinneqarnissaa kissaatigaajuk? ”Aap”-imik ”Naagga”-milluunniit akineqassaaq.

Imm. 5. Taasineq allalluni ingerlanneqassaaq pappiaqqamut taasivissami tamatumunnga aaqqissuussami Naalackersuisullu suliaritissimasaanni taasinikkut. Pappiaqqami taasivissami naqinneqarsimassaaq ”Najoqqutassiiviusumik innuttaasunik taasisitsineq” taasisitsinerullu qulequtaanik, ataatigut kalaallisut qallunaatullu ”Aap”-imik ”Naagga”-millu krydsiliiffissalerlugu.

Imm. 6. Inatsisartut inatsisaat akuersissutinut Inatsisartut inatsisaata atuutilernerata kingorna tunniunneqartunut atuuppoq.

Allannguutissatut siunnersuummut nassuiaatit

Nalinginnaasumik nassuiaatit

Allannguutissatut siunnersuutip malitsigissavaa Naalakkersuisut piginnaatinneqassammata Inatsisartut inatsisaata atuutilersinneqarnissaanut, taamaattorli Inatsisartut inatsisaat pillugu najoqqutassiiviusumik innuttaasut taasisinneqarnerata kingorna siusinnerpaamik sapaatit akunnerisa sisamat qaangiunneranni.

Innuttaasut tusarniarneqartinnagit Inatsisartut inatsisaata atuutilersinneqannginnissaata qularnaarneqarnissaa taamaaliornikkut siunertarineqarpoq.

Allannguutissatut siunnersuutip saqqummiunneqarneranut tunuliaqutaasut pillugit Inuussutissarsiornermut Aatsitassanullu Ataatsimiititaliap pingajussaaneerinninnermut ilassutitut isumaliutissiissutaa allatigut innersuussitigineqarpoq.

Inatsisartut inatsisaat pillugu najoqqutassiiviusumik innuttaasunik taasisitsineq Nunatta karsianut aningaasat millionit affaasa missaannik aningaasartuutaassasoq naatsorsuutigineqarpoq. Taakkununga ilanngunneqassapput innuttaasunik taasisitsinissaq sioqqullugu innuttaasunit paasisitsiniaanermut aningaasartuutit. Kingullermik innuttaasunik taasisitsisoqarmat innuttaasunik paasisitsiniaanermut aningaasartuutit 1,5 millioner kr.-iupput.

Allannguutissatut siunnersuummi aalajangersakkanut ataatsiakkaanut nassuiaatit

Nr. 1-imut

Allannguutissatut siunnersuummut nalinginnaasumik nassuiaatit innersuussutigineqarput.

Allannguutissatut siunnersuut

uunga

Uunga siunnersuut:

**Uranimik il. il., misissueqqaarnermut, ujaasinermit piiiaanermullu inerteqquteqarnek pillugu
Inatsisartut inatsisaat.**

Pingajussaaneerinninnermut Inuussutissarsiornermut Aatsitassanullu Ataatsimiititaliami amerlanerussuteqartunit Siumup Atassutillu ilaasortaataitaannit saqqummiunneqartoq

§ 2-mut

1. § 2 peerneqarpoq.

Allannguutissatut siunnersuummut nassuiaatit

Nalinginnaasumik nassuiaatit

Siunnersuummi § 2-p peerneqarnera allannguutissatut siunnersuutip kingunerissavaa. Aalajangersagaq malillugu Naalackersuisut piginnaatinneqarput § 1-imi inerteqquteqarnerup pinngoqqaatinut qinngornernik ulorianartunik akulinnut allanut aamma atuunnissaanik aalajangersakkanik aalajangersaasinnaanerminnut, soorlu aamma Naalackersuisut piginnaatinneqartut pinngoqqaatinik qinngornernik ulorianartunik akulinnut naliusunut killissaliussat akuerisaasut aalajangersarnissaannut. Piginnaatitsissut tamanna allannguutissatut siunnersuutikkut peerneqassaaq, taamaalillunilu § 1-imi inerteqquteqarnerup atuuffiata annertussusianik siunissami allanngortitsisarnissat Inatsisartut inatsisaatigut pisassallutik. Allannguutissatut siunnersuutip saqqummiunneqarneranut tunuliaqutaasut eqqarsaatigalugit Inuussutissarsiornermut Aatsitassanullu Ataatsimiititaliap aappassaaneerinninnermut isumaliutissiissutaa innersuussutigineqarpoq.

Allannguutisstat siunnersuut isumaqarpoq inatsisip atuuffiata annertussusia siunissami allanngortinneqassagaluarpat Inatsisartut ataatsimiinnissaat utaqqeqqaarneqartariaqartoq, tamannalu Naalackersuisut nalunaarutikkut taamatut allanngortitsinermik atuutilersitsisinnaanerannut sanilliullugu kinguartitsinermik malitseqarsinnaalluni. Siunnersuutip allatigut aningaasatigut allaffissornikkullu kinguneqarnissaa naatsorsuutigineqanngilaq, inatsisissatut siunnersuutip Inatsisartuni allaffissornikkut naalackersuinikkullu suliarineqarnerata nalinginnaasumik malitsigisartagai eqqaassanngikkaanni.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Allannguutissatut siunnersuummut nalinginnaasumik nassuiaatit innersuussutigineqarput.